

成實論

古籍

卷十六

四百十五
二六

50861



Vertical text or stamp fragment, possibly a date or signature.



成實論卷第十六

訶梨跋摩造

姚秦三藏鳩摩羅什譯

三禪品第一百六十七

離喜行捨憶念安慧受身樂是樂聖人亦說
亦捨憶念行樂入第三禪問曰何故離喜答
曰行者見喜能漂故離又此喜從想分別生
喜動轉相從初已來苦常隨逐以此故離又
行者得寂滅三禪故捨二禪又從喜生樂淺
離喜生樂深如人於妻子等不能常喜以喜
從想分別生故樂不從想分別生故能常有
行者亦尔喜初來則以為樂後則厭離問曰
若人為熱所惱則以冷為樂行者為何苦所



惱故以三禪爲樂。答曰：二禪中喜是發動想，如刺棘行者爲此喜所惱，故於無喜定中而生樂心。問曰：隨有熱苦，則以冷爲樂。若得離熱，冷則非樂。行者若已離喜，何故於三禪中猶生樂心？答曰：生樂二種，或由苦在，如有熱苦，則以冷爲樂；或由離苦，如離怨憎，如佛離拘舍彌比丘言：我安樂是事，亦尔得離動想。故於三禪生樂，如離五欲，故以初禪爲樂。行捨者以離喜，故心得寂滅。行者先深著喜心，多散亂，今得離，故其心寂滅。故說行捨憶念安慧者於喜過中，此二常備，不令喜來破壞。又憶念者，憶念喜安慧見喜中過受身樂者。

離喜行捨捨卽是樂以無動求故是樂不從
想分別生故名身受樂聖人亦說亦捨者說
名隨世人故說名為樂如說非想非非想處
心不貪著故捨憶念行樂者是人知捨謂見
喜過而生厭離故得妙捨又憶念亦好謂能
念喜過此中亦應說安慧與念同行故不說
樂者是第一樂是故聖人亦說亦捨問曰三
禪中有受樂何故說捨樂荅曰我此論中不
說離受別有捨樂受樂卽是捨樂問曰若介
第四禪中應說受樂以有捨故荅曰我說四
禪亦有受樂但爲滅第三禪樂故如是說問
曰若俱是受樂何故初禪二禪名喜三禪名

樂荅曰以想分別故名喜無想分別故名樂
行者於第三禪心轉攝故無想分別故名爲
樂又得三禪寂滅轉深故名爲樂如說動求
心聖人名苦動名分別言此是樂也

四禪品第一百六十八

除斷苦樂先滅憂喜不苦不樂捨念清淨入
第四禪問曰若先斷苦何故於此中說若必
欲說應言先斷如先滅憂喜荅曰四禪名不
動欲成此不動相故說無四受所以者何動
名發動行者爲樂苦所侵則心動心動則生
貪恚故斷樂苦令心不動問曰若第四禪受
利益最大何故不名爲樂荅曰是受寂滅故

說不苦不樂隨心念知此是樂則名爲樂得
第四禪離三禪樂故不以爲樂捨念清淨者
此中捨清淨以無求故三禪有求謂此是樂
又此禪中念亦清淨所以者何三禪中以著
樂故憶念散亂至四禪中樂貪斷故憶念清
淨問曰何故四禪不說安慧荅曰若說憶念
清淨當知已說安慧以此二法不相離故又
此是禪定道非智慧道安慧是慧故不說第
三禪後分中亦不說安慧但說行捨憶念樂
不說行捨念慧樂又此憶念能成禪定若人
定未成時要以取想憶念能成所以獨說又
得上功德捨下功德不須思惟故不說慧問

曰不苦不樂受是無明分四禪中多與慧相
違故不說慧答曰若尔不苦不樂受不應爲
無漏樂受是貪分故亦無無漏問曰三禪中
爲違自地過故說安慧爲違他地過故說憶
念四禪自地無如是過故不說安慧答曰四
禪亦有貪等過故應說安慧是中貪過細微
難覺故必應當說餘地中亦應說而不說故
知應如我答問曰何故四禪出入息滅答曰
息依身心何以知之隨心細時喘息亦細四
禪心不動故出入息滅又如人疲極若擔重
上山則喘息麁息時則細四禪亦尔以無動
想心止息故出入息滅有人言行者得四禪

四大故身諸毛孔閉是故息滅此事不然所以者何飲食汁流充遍身中若諸毛孔閉則不應行而實不可故知四禪心力能令息滅問曰四禪中無樂受是中云何有愛使經中說樂受中愛使荅曰是中有細樂受但斷麁樂故說不苦不樂如風動燈若置密室則名不動是中必有微風故然但無麁風故名不動四禪亦尔必有細樂斷麁苦樂故名不苦不樂

無邊虛空處品第一百六十九

過一切色相滅有對相不念一切異相入無邊虛空處色相名色香味觸相行者以何故

過謂此色中有對有礙及諸異相謂鍾鼓等
此諸相是種種煩惱種種業種種苦因此
故過若過一切色相則有對相滅有對相滅
則無異相是中略故不說過此故此滅復有
人言一切色相者即是眼識所依止相有對
相者是耳鼻舌身識所依止相異相者是意
識所依止相此事不然所以者何若言滅有
對相則已攝色何故別說又離色相對相無
別有意識所依止色是故不應別說異相應
如先說入無邊虛空處者行者以色相逼內
疲倦故觀無邊虛空內取眼鼻咽喉等虛空
相外取井穴門向樹間等虛空相又觀身死

棄之塚間火燒滅盡若鳥獸食噉虫從中出
故知此身先有虛空問曰是虛空定以何爲
緣荅曰初緣虛空成已自緣諸陰亦緣他諸
陰所以者何以悲爲首作如是念衆生可愍
爲色相所惱問曰此定何衆生緣荅曰緣一
切衆生問曰是行者離色相云何能緣欲色
衆生荅曰是行者能緣色但於色中心不通
暢不樂不著如經中說若聖人深見憶念五
欲於中不樂不通不著畏沒退還如燒筋羽
若念泥洹心則通暢此人如是亦能緣色但
不貪樂又如行者雖離色相以虛空邊能緣
四禪如無色定能緣無漏色是中無過非煩

惱處故餘亦應介問曰虛空是色入性云何
緣此能過色相荅曰此定緣無爲虛空故能
過色問曰此定不緣無爲處空所以者何此定
方便中說緣眼等中虛空故知緣有爲虛空
又經中不說無爲虛空相但說有爲虛空相
所謂無色處名虛空是故無爲虛空荅曰色
性不名虛空所以者何經中說虛空無色不
可見不可對問曰更有經說因明知虛空除
色無有餘法因明知荅曰無色名虛空諸
色以明可知是故因明則知色無非有虛空
又於闇中亦知虛空盲人以手亦知虛空又
以杖亦知此是虛空故知虛空非是色性色

不以此等因緣可知又色是有對虛空無對
又以火等能盡滅色而不能滅虛空若虛空
滅更名何爲法問曰若有色生則虛空滅如
起牆壁是中則無復有虛空答曰此中色生
是色竟無所滅所以者何色無名虛空無法
不可更無是故色不滅空又汝言虛空是色
是中無有因緣可令是色問曰現見門向等
中虛空現見事中不須因緣答曰虛空不可
現見先已破故所謂闇中亦可知等問曰若
虛空非色爲是何法答曰虛空名無法但無色
處名爲虛空問曰經中說因六種故衆生受
身又說虛空名不可見無色無對若無法不

得作如是說無有說兔角名不可見無色無對答曰若實有法皆有所依如名依色色亦依名虛空無依故知無法汝言空種是亦不然所以者何色礙於色是色得異色無則得增長以此義故佛說因六種衆生受身汝言虛空無色無形無對亦以破諸物故作如是說不說有虛空相汝言無有說兔角爲不可見無色無對是亦不然所以者何皆由虛空得有所作來去等事兔角等中無如是義問曰心亦如是無色無形無對可言無耶答曰心有作業謂能取緣虛空無業但以無故得有所作故知無法是故此定初緣虛空問曰

此定能緣何地。答曰：此定緣一切地及緣滅道。問曰：有人言：諸無色定雖能緣滅，但緣比智分滅，不緣現智分滅。是事云何？答曰：緣一切滅以現法智緣。現在自地滅，以比智緣餘滅道。亦如是能緣一切治。故問曰：生無色界衆生能起餘地心不？答曰：能起餘地心及無漏心。問曰：若尔云何不沒？答曰：住業果報中，故能不沒。如欲色界中神通力，故住異色異心而能不沒。彼中亦尔。問曰：無邊虛空定與虛空處一切處有何差別？答曰：欲入虛空定，方便道名一切入定，成已名虛空定。是中定因果是地一切有漏，無漏若定非定。若垢若

淨皆名無邊虛空處

三無色定品第一百七十

過一切無邊虛空處入無邊識處行者深厭
色故亦捨色治法如人渡河已亦棄船去如
得出賊欲遠捨去行者亦尔雖因空破色亦
欲遠去無邊識者行者以識能緣無邊虛空
則識無邊是故捨空緣識又如爲色疲倦故
緣虛空如是以虛空疲勞欲止息故但緣於
識又此人以識能緣空故謂識爲勝故但緣
識行者以識隨緣隨時故有無邊疲倦厭離
欲還破識故入無所有處作如是念隨有識
則苦我若有無邊識必當有無邊苦是故攝

緣識心心微細故謂無所有復作是念無所
有即是想想爲苦惱如病如癱若無想復是
愚癡我若見無所有即爲是有故於諸想未
得解脫行者見想爲衰患無想爲癡寂滅微
妙所謂非想非非想處凡夫常怖畏無想以
爲愚癡是故終無能滅心者有人言無想衆
生亦能滅心是事不然所以者何若色界中
能滅心者無色界中何故不能問曰色界有
色故能滅心無色界中先已滅色今復滅心
若見色心俱滅則驚怖迷悶荅曰若在彼中
不能滅者於此間生則應能滅如滅盡定問
曰是滅心果無想是故若滅色心則爲永失

答曰滅盡定亦有有心果此事亦尔又若果不斷亦名住於果如在變化色變化心中還生果故不名永滅是故色界中不應說滅心若說者無色界中亦應當說又無想定中心不應滅所以者何行者要厭離心故能滅心若厭心者尚不厭生無色界中況生色界又凡夫人於心生我想如經中說凡夫長夜貪著此心謂之爲我是故不能無餘厭離又經中說外道能說斷滅三取而不能說斷我語取是故不能滅心又若正知因緣法者能得心空如猴狻喻經說凡夫或能離身而不能離心寧觀身常勿觀心常所以者何眼見

是身或任十歲乃至百年所謂若心若意若
識是事念念生滅變異如猿猴緣樹捨一枝
攀一枝不任一處若聖弟子於中正觀因緣
法故能知無常又知因緣法者以受差別故
能分別識諸外道輩以無分別因緣智故不
能滅心又凡夫人離色不離心故不得解脫
若俱能滅心復以何故不得解脫又凡夫人
怖畏滅故於泥洹中終不能生安隱寂滅想
如經中說無我無我所是凡夫人深怖畏
處又於無想中生愚癡心若於泥洹不生寂
滅安隱想者云何當能滅心又凡夫法要因
上地能捨下地是故無能滅心因緣但以定

力細想現前心不覺故自謂無想若起鹿想
即時退墮如少智人名曰無智如食少鹹名
爲無鹹如迷悶失念蟄垂冰魚如說非想非
非想處此中亦尔雖實有想隨世俗故說名
無想

滅盡定品第一百七十一

過一切非想非非想處身證想受滅問曰何
故諸禪中不說過一切無色定中不說滅耶
荅曰我說諸禪定中皆有覺觀喜樂等法是
故不說過一切也問曰無邊虛空處有色心
此事已明故無色中亦不應說過一切荅曰
若入無邊虛空定中得脫色心而不得脫覺

觀等法復有人言若說過滅沒皆義一而異
名又無色中定心堅固下地中心為散亂所
壞是故不說過一切問曰若俱說有刺棘謂
色想等何故說心堅固耶荅曰雖俱說刺棘
亦名第四禪為無動如是無色定中定力大
故得名堅固問曰學人不應得滅盡定以未
過一切非想非非想處故荅曰學人能見非
想非非想處一切行滅但未能令其不生故
得說過問曰若此中意以泥洹為滅者汝先
言九次第中滅是心心數滅是則相違荅曰
滅定二種一諸煩惱盡二煩惱未盡煩惱盡
者在解脫中煩惱未盡者在次第中一滅煩

惱故名滅定二滅心心數法故名滅定滅煩
惱是第八解脫亦名阿羅漢果阿羅漢果名
滅一切想今不復生此中雖滅諸想有餘結
故不能令更不生問曰若行者以九次第定
能滅心者須陀洹等云何能證心滅法耶荅
曰九次第中滅名爲大滅若人善修諸禪定
道心力強故能得此滅若無斯力則但有滅
不能如是爲大力故說次第定餘處亦有心
滅如第四禪中能滅心心數法入於無想初
禪等中何故無滅又餘處亦應有滅心義如
經中說須陀洹等皆能證滅但心滅名滅更
無餘法滅故知離此九地亦有心滅問曰若

滅盡定能滅一切心心數法何故但說想受
滅耶答曰一切心皆名爲受是受二種一想
受二慧受想受名有爲緣心以想行假名法
中故假名二種一因和合假名二法假名是
故一切有爲緣心皆名爲想慧受名無爲緣
心是故若說想受滅者則爲說一切滅問曰
一切心心數法中受想最勝是故獨說所以
者何煩惱有二分一受分二見分愛生受分
想生見分又欲色界中受勝無色界中想勝
是故但說二種又諸識處中但說受想識處
從心起故即名爲行又若說受想滅則說一
切心心數滅以諸心數不相離故答曰不然

汝言勝故獨說應當說心所以者何處處經
中說心爲王亦是二分煩惱所依亦以心差
別故名爲受想故應說心又說心則易是故
汝說非也問曰此定何故說身證耶答曰八
解脫皆應說身證又是滅法非言所了故說
身證如觸水者則知冷相非聞能知此事亦
亦又此是無心法故應以身證問曰汝說滅
定是無心法此義不然所以者何入此定者
是衆生世間無有無心衆生是故不然又經
中說命熱識此三法常不相離故無滅心又
一切衆生皆以四食得存入滅盡定則無諸
食所以者何是人。不食搏食觸等亦滅故無

食也又心從心生若此心滅餘心不生無次第緣故後心云何更生又心但入無餘泥洹斷相續時滅非餘處滅如經中說以色過諸欲以無色過色以滅過諸作念思惟心爲作念思惟要以滅能過得有餘泥洹則垢心滅得無餘泥洹則無垢心滅此是佛法正義又入滅定者不名爲死心滅名死若滅心還生死者亦應更生然則終無有死若滅心還生入泥洹者亦應還生然則終無解脫而實不然故心不滅荅曰汝言無無心衆生雖同無心而異於死如經中問曰滅盡定者與死有何差別荅曰言死者命熱識三事都滅入滅

盡定者但心滅而命熱不離於身故知應有
無心衆生又是人心得常在以得力故亦名
有心不同木石汝言三事不相離者爲欲色
界衆生故說無色界中有命有識而無熱又
入滅盡定者有命有熱而無識即此經中亦
說識離於身是故若言三事不相離者隨有
麴說汝言無食云何存者此身以先意思食
故任現在以冷等觸故能持身汝言忘心因心生
心與異心作因作因已滅是故能生異心問曰
云何滅心能生異心如眼滅已則不能生識
答曰如已滅業能生果報是事亦尔又意與
意識二事相礙眼與眼識不如是是故非因汝

言斷相續時心滅是事不然滅有三種色滅
心滅或色心俱滅或色滅非心如無色中或
心滅非色如入滅定或色心俱滅如斷相續
時汝言入滅盡定不名死者是人命熱不滅
死者三事都滅是則爲異又此人因命熱故
心能更生死者不尔汝言若滅心還生則無
解脫是事不然所以者何入泥洹者先業所
受命熱識滅不期更生此人命熱不滅先期
心生如滅盡定品中說入滅盡定者因是六
入及身命故還能起是故心能更生入泥洹
者心更不生故知此定無心問曰何故施起
此定者能得現報荅曰從此定起心深寂滅

如經中說起滅定者心順泥洹又是人禪定
力強依此定故智慧亦大智慧大故能令施
者得勝果報如人供養百千聲聞不如一佛
是中皆以智慧為勝不在斷結是事亦尔又
入此定者以多善法熏修其心故生大果如
善治田所收必多又施多財世者則得大報
起滅定者深惡世間是故供養為勝又施淨
心者得大果報非垢心者此人不以假名垢
心是故供養得大果報又是人常在第一義
諦餘人住於世諦又此人常在無諍法中所
以者何有為緣心則有諍訟又如經中說穉
穉害禾貪欲害心是故施無欲人得大果報

貪欲因緣謂假名相起此定者緣泥洹故離
假名相又經中說若人受檀越供已入無量
定是檀越以此因緣得無量福起滅定者緣
泥洹心是名無量此滅亦是無量得無量福
故能得現報又以八功德嚴此福田泥洹緣
心是真正見餘分隨從是故能生現報問曰
有人言滅盡定是心不相應行亦名世間法
此事云何荅曰如上說起此定者有深寂滅
等諸功德是功德世間所不應有問曰滅盡
定者為是遮法以此法故令心不生是故應
名心不相應行如鐵得火則無黑相離火還
生此事亦尔荅曰若尔者泥洹亦應是心不

相應行所以者何因泥洹故餘陰不生若泥洹非心不相應行者此定亦不應名不相應行但諸行者法應如是入此定中隨所願故心能不生是故不應說名不相應行問曰此定如是次第入者亦應次第起耶答曰亦次第起漸入鹿心問曰經中說初起滅盡定者觸三種觸所謂無動無相無所有何故如是答曰無為緣心中所有觸名無動無相無所有無動即是空有為緣心輕故有動所謂取色受等空中無相無相中無貪等所有此無心者初緣泥洹後緣有為故說起時觸三種觸問曰有人言入滅盡定心是有漏起定心

或有漏或無漏是事云何答曰非有漏行者
欲入此定先來破壞一切有為破已故入起
時泥洹緣心現前故知俱是無漏問曰經中
說行者入滅盡定時不自念入起時亦不自
念若尔云何能入答曰常修習故定力堅強
雖不自念而能得入又此行者從斷有為尔
來入滅若不制心令緣有為則不名入是故
經說入此定者先調習心故能得入問曰若
無異空可得修無為緣心更得何利答曰久
修習故定則堅固知見明了如有為緣心見
念念滅亦無異念念滅但久修習則心堅固
此事亦尔

十一切處品第一百七十二

不壞前緣心力自在名一切處行者取少相
已以信解力令其增廣所以者何此攝心力
若入實中則皆能令空入信解中皆能令隨
先所取相問曰何者是信解性荅曰青等諸
色無量略說其本有四地等四大是四色本
能破此八事是名虛空以識能知無邊空故
亦名無邊所以者何非有邊法能取無邊是
名為十問曰地中實有水等行者云何能觀
但是地耶荅曰久習此觀常取地相後但見
地不見餘物問曰行者所見地相實為地不
荅曰以信解力故見為地非實為地問曰若

變化力有所變化亦非實耶荅曰變化以定力成故所作皆實所謂光明及水火等問曰有論師言八一切處但在第四禪中是事云何荅曰若在欲界及三禪中有何各耶後二一切處各當自地此十皆是有漏以不壞緣故問曰虛空相非破色耶荅曰行者亦以信解取眼鼻等空相爲空不能直破實色是故亦名信解問曰經中說入一切地定者念地即是我我即是地何故作如是念荅曰行者見心遍滿故生此念一切是我問曰有人言此定但緣欲界繫地等是事云何荅曰若緣一切欲色界繫地等有何各耶假令此定更

緣餘法復有何咎又此定是信解觀虛妄緣
無有不虛地等問曰佛弟子亦觀地等是事
云何荅曰學人若觀皆爲破壞問曰實非一
切皆是地等云何此定非顛倒耶荅曰此觀
中有癡分以此觀中起我見故不淨等觀雖
非真實而隨順離欲此觀不尔故有癡分問
曰何故不觀受等無邊但觀識耶荅曰可取
是地等取者是識是故見識不見受等又先
說受等皆心之差別又行者不見受等遍滿
以不一切處受苦樂故佛弟子若行此定爲
壞緣故所以者何此緣是行者所貪著處若
不破壞則同凡夫

十想無常想品第一百七十三

無常想苦想無我想食馱想一切世間不可
樂想不淨想死想斷想離想滅想無常想者
謂無常法中定知無常問曰何故一切無常
答曰是一切法皆從緣生因緣壞故皆歸無
常問曰不然有法雖從緣生而非無常如外
經說為三祠者得生常處又梵世身常答曰
汝法中亦說釋提桓因能作百祠亦復退墮
又偈中說多諸帝釋等造過百千祠皆悉無
常盡百千祠者猶不在故知三祠非常又釋
提桓因及天王等身分亦盡是故從緣生法
無有常者又汝法中以韋陁為貴韋陁中說

由智慧故得不死法如說見曰色大人過於
世性先隨順此人意則能得不死道更無餘
道小人神小大人神大常在身中若人不知
此神相者雖復讀誦韋陀等經無所益也又
梵世身皆是無常何以知之汝法中說梵王
亦常祀祠持戒為諸功德若知身常何故為
福又聞汝經中說諸梵王有惡姪欲若有姪
欲必有瞋等一切煩惱若有煩惱必有罪業
如是罪人云何當能得常解脫又非一切神
仙皆為天祠亦不一切行梵天道若此是常
則盡應為之又一切万物皆悉無常所以者
何若地水火風大劫盡時更無有餘又時轉

如輪故知無常又成就戒定慧等無量功德
諸大聖人定光佛等及辟支佛摩訶三摩伽
等劫初諸王皆悉無常當有何物常耶又佛
自說一切生法皆無常定相如牛糞經中說
佛以少牛糞示諸比丘無介所色常定不變
是經中廣說釋梵轉輪諸王果報亦盡故知
一切無常又三界一切皆有壽量阿鼻地獄
極壽一劫僧伽陀地獄壽命半劫餘則或多
或少龍等極多亦壽一劫餓鬼極多壽七萬
歲弗于逮壽二百五十歲拘耶尼壽五百歲
鬱單越定壽千歲閻浮提壽或無量劫或壽十
歲四天王壽天五百歲乃至有頂壽八萬劫

故知三界一切無常又以三種信信知無常
現見中無有法是常聖人所說中亦無法常
比知中亦無有常要先現見後比知故又若
有處常何有智者滅一切法而求解脫誰不
欲與所愛常共同止受諸樂者而實智者皆
求解脫故知生法無得常者又復當說一切
生法皆念念滅尚無況有常耶問曰修
無常想能辦何事答曰能破煩惱如經中說
善修無常想能壞一切欲染色染及無色染
掉慢無明問曰不然此無常想亦增貪欲如
人覺知盛年不久則深著婬欲如華不久鮮
則速用爲樂知他妙色非己常有則駛增婬

欲如是隨知無常則生貪著故無常想不壞
貪欲亦有人知無常故而爲殺等又乃至畜
生皆知無常而亦不能破諸煩惱是故修無
常想無所利益荅曰以無常故生別離苦失
盛年安樂壽命富貴智者以此則不生喜心
無喜心故不生貪心因受故愛受滅則愛滅
故知無常想能斷貪欲又若法無常即爲無
我行者能觀無常無我則不生我心無我心
故無我所心我我所無故何所貪欲又能修
習無常想者於自他身見念念滅死去何生
貪又行者隨所求事皆無常壞敗則爲所誑
以虛誑故不生貪著如小兒尚知空捲誑故

不生貪著又衆生不喜不牢固事如人不喜
朽故器物亦如女人聞某男子命不過七日
雖復盛年端正尊貴勢力誰當喜喜者是人正
以無常想故不生貪著又智者常習別離想
故不樂和合所以者何智者憶念退墮等苦
乃至天欲尚不生貪但求解脫汝言無常增
貪欲者是事不然若人未斷我慢見外物無
常故生憂悲失所愛惜故生貪求是凡夫人
除捨欲樂更不知離苦猶如嬰兒爲母所打
還來趣母智者知苦因猶在苦不可滅即捨
苦因所謂五陰又此行者壞裂內陰得無我
心雖失外物不生憂惱得無我者更何所求

無常想者亦無所求又此無常想若未能生
苦無我想則不名具足能破煩惱故經中說
應一心正觀五陰無常若不壞內陰見外物
無常以有我心故生憂悲此則不名正觀又
人雖見無常亦不生厭離如屠獵等是人雖
知無常不名善習又人雖能正觀而不能常
勤修習則貪心間錯故說一心又人少修無
常而多煩惱則不能壞如藥少病多此事亦
尔故說一心正觀無常能破煩惱又知法無
常是名真智慧真智慧中無有貪等煩惱所
以者何以無明因緣故有貪等當知無常非
增貪欲又無常想能滅一切煩惱行者若知

此物無常則無有貪又知此人必自當死何
為生瞋何有智人瞋將死者又若法無常云
何以此而生高心又知諸法無常性故則不
生癡以無癡故亦無疑等故知無常相違諸
煩惱

成實論卷第十六

二

喘

昌軟反

閉

二同必計反

咽喉

二字音迺侯

筋

斤音

獲猴

二字音

鹹

二同音咸上正

蟄

上直立反亦

梯

稗

上音賣反

祠

一字音似

駛

使史一音或

捲

巨

負反

屠

下良

輒

下良

輒

下良

輒

